

## Ibrāniyoñ

### *Allāh kā Apne Farzand ke zariye Kalām*

<sup>1</sup> Māzī meñ Allāh muḵhtalif mauḳoñ par aur kaī tariḳoñ se hamāre bāpdādā se hamkalām huā. Us waqt us ne yih nabiyōñ ke wasīle se kiyā

<sup>2</sup> lekin in āḳhirī dinoñ meñ wuh apne Farzand ke wasīle se ham se hamkalām huā, usī ke wasīle se jise us ne sab chīzoñ kā wāris banā diyā aur jis ke wasīle se us ne kāynāt ko bhī ḳhalaq kiyā.

<sup>3</sup> Farzand Allāh kā shāndār jalāl mun'akis kartā aur us kī zāt kī ain shabīh \* hai. Wuh apne qawī kalām se sab kuchh sañbhāle rakhtā hai. Jab wuh duniyā meñ thā to us ne hamāre lie gunāhoñ se pāk-sāf ho jāne kā intazām qāym kiyā. Is ke bād wuh āsmān par Qādir-e-mutlaq ke dahne hāth jā baiṭhā.

### *Allāh ke Farzand kī Azmat*

<sup>4</sup> Farzand farishtoñ se kahīñ azīm hai, itnā jitnā us kā mīrās meñ pāyā huā nām un ke nāmoñ se azīm hai.

<sup>5</sup> Kyoñki Allāh ne kis farishte se kabhī kahā,  
 “Tū merā Farzand hai,  
 āj maiñ terā Bāp ban gayā hūñ.”

Yih bhī us ne kisī farishte ke bāre meñ kabhī nahīñ kahā,

“Maiñ us kā Bāp hūngā  
 aur wuh merā Farzand hogā.”

---

\* 1:3 Yā naqsh.

6 Aur jab Allāh apne pahlauṭhe Farzand ko āsmānī duniyā meñ lātā hai to wuh farmātā hai,  
 “Allāh ke tamām farishte us kī parastish karen.”

7 Farishton ke bāre meñ wuh farmātā hai,  
 “Wuh apne farishton ko hawāeñ  
 aur apne ḵhādimoñ ko āg ke shole banā detā hai.”

8 Lekin Farzand ke bāre meñ wuh kahtā hai,  
 “Ai Ḵhudā, terā taḵht azal se abad tak qāym-o-dāym rahegā,  
 aur insāf kā shāhī asā terī bādshāhī par hukūmat karegā.

9 Tū ne rāstbāzī se muhabbat  
 aur bedīnī se nafrat kī,  
 is lie Allāh tere Ḵhudā ne tujhe ḵhushī ke tel se masah karke  
 tujhe tere sāthiyōñ se kahīn zyādā sarfarāz kar diyā.”

10 Wuh yih bhī farmātā hai,  
 “Ai Rab, tū ne ibtidā meñ duniyā kī buniyād rakhī,  
 aur tere hī hāthon ne āsmānoñ ko banāyā.

11 Yih to tabāh ho jāeñge,  
 lekin tū qāym rahegā.

Yih sab libās kī tarah ghis-phaṭ jāeñge  
 12 aur tū inheñ chādar kī tarah lapetegā,  
 purāne kapre kī tarah yih badle jāeñge.

Lekin tū wuhī kā wuhī rahtā hai,  
 aur terī zindagī kabhī ḵhatm nahīn hotī.”

13 Allāh ne kabhī bhī apne kisī farishte se yih bāt na kahī,

“Mere dahne hāth baiṭh,  
 jab tak maiñ tere dushmanōñ ko

tere pānwoñ kī chaukī na banā dūñ.”

<sup>14</sup> Phir farishte kyā haiñ? Wuh to sab k̄hidmatguzār rūh haiñ jinheñ Allāh un kī k̄hidmat karne ke lie bhej detā hai jinheñ mīrās meñ najāt pānī hai.

## 2

### *Najāt kī Azmat*

<sup>1</sup> Is lie lāzim hai ki ham aur zyādā dhyān se kalām-e-muqaddas kī un bātoñ par ghaur karen jo ham ne sun lī haiñ. Aisā na ho ki ham samundar par beqābū kashtī kī tarah bemaqsad idhar-udhar phireñ.

<sup>2</sup> Jo kalām farishtoñ ne insān tak pahuñchāyā wuh to anmiṭ rahā, aur jis se bhī koī k̄hatā yā nāfarmānī huī use us kī munāsib sazā milī.

<sup>3</sup> To phir ham kis tarah Allāh ke ghazab se bach sakeñge agar ham Masīh kī itnī azīm najāt ko nazarandāz karen? Pahle K̄hudāwand ne k̄hud is najāt kā elān kiyā, aur phir aise logoñ ne hamāre pās ā kar is kī tasdīq kī jinhoñ ne use sun liyā thā.

<sup>4</sup> Sāth sāth Allāh ne is bāt kī is tarah tasdīq bhī kī ki us ne apnī marzī ke mutābiq ilāhī nishān, mojize aur mukhtalif qism ke zordār kām dikhāe aur Rūhul-quds kī nemateñ logoñ meñ taqsīm kīñ.

### *Masīh kā Najātbak̄hsh Kām*

<sup>5</sup> Ab aisā hai ki Allāh ne mazkūrā āne wālī duniyā ko farishtoñ ke tābe nahīñ kiyā.

<sup>6</sup> Kyonki kalām-e-muqaddas meñ kisī ne kahīñ yih gawāhī dī hai,

“Insān kaun hai ki tū use yād kare  
yā ādamzād ki tū us kā ḵhayāl rakhe?

<sup>7</sup> Tū ne use thoṛī der ke lie farishtoñ se kam  
kar diyā,

tū ne use jalāl aur izzat kā tāj pahnā kar

<sup>8</sup> sab kuchh us ke pāñwoñ ke nīche kar diyā.”

Jab likhā hai ki sab kuchh us ke pāñwoñ tale  
kar diyā gayā to is kā matlab hai ki koī chīz na  
rahī jo us ke tābe nahīn hai. Beshak hamēñ hāl  
meñ yih bāt nazar nahīn ātī ki sab kuchh us ke  
tābe hai,

<sup>9</sup> lekin ham use zarūr deḵhte haiñ jo “Thoṛī  
der ke lie farishtoñ se kam” thā yānī Īsā ko jise  
us kī maut tak ke dukh kī wajah se “Jalāl aur  
izzat kā tāj” pahnāyā gayā hai. Hāñ, Allāh ke  
fazl se us ne sab kī ḵhātir maut bardāsht kī.

<sup>10</sup> Kyoñki yihī munāsib thā ki Allāh jis ke lie  
aur jis ke wasīle se sab kuchh hai yoñ bahut-se  
beṭoñ ko apne jalāl meñ sharīk kare ki wuh un  
kī najāt ke bānī Īsā ko dukh uṭhāne se kāmiliyat  
tak pahuñchāe.

<sup>11</sup> Īsā aur wuh jinheñ wuh maḵsūs-o-  
muqaddas kar detā hai donoñ kā ek hī Bāp  
hai. Yihī wajah hai ki Īsā yih kahne se nahīn  
sharmātā ki muqaddasīn mere bhāī haiñ.

<sup>12</sup> Masalan wuh Allāh se kahtā hai,

“Maiñ apne bhāiyoñ ke sāmne tere nām kā  
elān karūnga,

jamāt ke darmiyān hī terī madahsarāī  
karūnga.”

<sup>13</sup> Wuh yih bhī kahtā hai, “Maiñ us par bharosā  
rakhūngā.” Aur phir “Maiñ hāzir hūñ, maiñ aur  
wuh bachche jo Allāh ne mujhe die haiñ.”

<sup>14</sup> Ab chūnki yih bachche gosht-post aur ḳhūn ke insān haiñ is lie Īsā ḳhud un kī mānind ban gayā aur un kī insānī fitrat meñ sharīk huā. Kyoñki is tarah hī wuh apnī maut se maut ke mālik Iblīs ko tabāh kar sakā,

<sup>15</sup> aur is tarah hī wuh unheñ chhuṛā sakā jo maut se ḍarne kī wajah se zindagī-bhar ḡhulāmī meñ the.

<sup>16</sup> Zāhir hai ki jin kī madad wuh kartā hai wuh farishte nahīn haiñ balki Ibrāhīm kī aulād.

<sup>17</sup> Is lie lāzim thā ki wuh har lihāz se apne bhāiyoñ kī mānind ban jāe. Sirf is se us kā yih maqsad pūrā ho sakā ki wuh Allāh ke huzūr ek rahīm aur wafādār imām-e-āzam ban kar logoñ ke gunāhoñ kā kaffārā de sake.

<sup>18</sup> Aur ab wuh un kī madad kar saktā hai jo āzmāish meñ uljhe hue haiñ, kyoñki us kī bhī āzmāish huī aur us ne ḳhud dukh uṭhāyā hai.

### 3

#### *Īsā Mūsā se Baṛā Hai*

<sup>1</sup> Muqaddas bhāiyo, jo mere sāth Allāh ke bulāe hue haiñ! Īsā par ḡhaur-o-ḳhauz karte raheñ jo Allāh kā paighambar aur imām-e-āzam hai aur jis kā ham iqrār karte haiñ.

<sup>2</sup> Īsā Allāh kā wafādār rahā jab us ne use yih kām karne ke lie muqarrar kiyā, bilkul usī tarah jis tarah Mūsā bhī wafādār rahā jab Allāh kā pūrā ghar us ke sapurd kiyā gayā.

<sup>3</sup> Ab jo kisī ghar ko tāmīr kartā hai use ghar kī nisbat zyādā izzat hāsīl hotī hai. Isī tarah Īsā Mūsā kī nisbat zyādā izzat ke lāyq hai.

4 Kyonki har ghar ko kisī na kisī ne banāyā hotā hai, jabki Allāh ne sab kuchh banāyā hai.

5 Mūsā to Allāh ke pūre ghar meñ k̄hidmat karte waqt wafādār rahā, lekin mulāzim kī haisiyat se tāki kalām-e-muqaddas kī āne wālī bātoñ kī gawāhī detā rahe.

6 Masīh farq hai. Use Farzand kī haisiyat se Allāh ke ghar par ikhtiyār hai aur isī meñ wuh wafādār hai. Ham us kā ghar haiñ basharteki ham apnī dilerī aur wuh ummīd qāym rakheñ jis par ham faḡhr karte haiñ.

### *Allāh kī Qaum ke lie Sukūn*

7 Chunāñche jis tarah Rūhul-quds farmātā hai,  
“Agar tum āj Allāh kī āwāz suno

8 to apne diloñ ko saḡht na karo jis tarah baḡhāwat ke din huā,  
jab tumhāre bāpdādā ne registān meñ mujhe āzmāyā.

9 Wahāñ unhoñ ne mujhe āzmāyā aur jāñchā,  
hālāñki unhoñ ne chālīs sāl ke daurān mere kām dekh lie the.

10 Is lie mujhe us nasl par ḡhussā āyā aur main bolā,

‘Un ke dil hameshā sahīh rāh se haḡ jāte haiñ aur wuh merī rāheñ nahīñ jānte.’

11 Apne ḡhazab meñ main ne qasam khāī,  
‘Yih kabhī us mulk meñ dāḡhil nahīñ hoñge jahāñ main unheñ sukūn detā.’ ”

12 Bhāiyo, k̄habardār raheñ tāki āp meñ se kisī kā dil burāī aur kufr se bhar kar zindā K̄hudā se bargashtā na ho jāe.

13 Is ke bajāe jab tak Allāh kā yih farmān qāym hai rozānā ek dūsre kī hauslā-afzāī karen tāki āp

meñ se koī bhī gunāh ke fareb meñ ā kar saḡhtdil na ho.

<sup>14</sup> Bāt yih hai ki ham Masīh ke sharīk-e-kār ban gae haiñ. Lekin is shart par ki ham āḡhir tak wuh etamād mazbūtī se qāym rakheñ jo ham āḡhāz meñ rakhte the.

<sup>15</sup> Mazkūrā kalām meñ likhā hai,  
 “Agar tum āj Allāh kī āwāz suno,  
 to apne diloñ ko saḡht na karo jis tarah baḡhāwat ke din huā.”

<sup>16</sup> Yih kaun the jo Allāh kī āwāz sun kar bāḡhī ho gae. Wuh sab jinheñ Mūsā Misr se nikāl kar bāhar lāyā.

<sup>17</sup> Aur yih kaun the jin se Allāh chālīs sāl ke daurān nārāz rahā? Yih wuhī the jinhoñ ne gunāh kiyā aur jo registān meñ mar kar wahīn paṛe rahe.

<sup>18</sup> Allāh ne kin kī bābat qasam khāi ki “Yih kabhī bhī us mulk meñ dāḡhil nahīñ hoñge jahāñ maiñ unheñ sukūn detā”? Zāhir hai un kī bābat jinhoñ ne nāfarmānī kī thī.

<sup>19</sup> Chunāñche ham deḡhte haiñ ki wuh imān na rakhne kī wajah se mulk meñ dāḡhil na ho sake.

## 4

<sup>1</sup> Dekheñ, ab tak Allāh kā yih wādā qāym hai, aur ab tak ham sukūn ke mulk meñ dāḡhil ho sakte haiñ. Is lie aeñ, ham ḡhabardār raheñ. Aisā na ho ki āp meñ se koī pīchhe rah kar us meñ dāḡhil na hone pāe.

<sup>2</sup> Kyoñki hameñ bhī un kī tarah ek ḡhushḡhabrī sunāi gaī. Lekin yih paighām

un ke lie befāydā thā, kyoṅki wuh use sun kar īmān na lāe.

<sup>3</sup> Un kī nisbat ham jo īmān lāe haiṅ sukūn ke is mulk meṅ dāḳhil ho sakte haiṅ.

Ġharz, yih aisā hī hai jis tarah Allāh ne farmāyā,

“Apne ġhazab meṅ main ne qasam khāī,  
‘Yih kabhī us mulk meṅ dāḳhil nahīn hoṅge  
jahān main unheṅ sukūn detā.’ ”

Ab ġhaur kareṅ ki us ne yih kahā agarche us kā kām duniyā kī taḳhlīq par iḳhtitām tak pahuṅch gayā thā.

<sup>4</sup> Kyoṅki kalām-e-muqaddas meṅ sātweṅ din ke bāre meṅ likhā hai, “Sātweṅ din Allāh kā sārā kām takmīl tak pahuṅch gayā. Is se fāriḡh ho kar us ne ārām kiyā.”

<sup>5</sup> Ab is kā muqābalā mazkūrā āyat se kareṅ,  
“Yih kabhī us mulk meṅ dāḳhil nahīn hoṅge  
jahān main unheṅ sukūn detā.”

<sup>6</sup> Jinhoṅ ne pahle Allāh kī ḳhushḳhabrī sunī unheṅ nāfarmān hone kī wajah se yih sukūn na milā. To bhī yih bāt qāym rahī ki kuchh to sukūn ke is mulk meṅ dāḳhil ho jāeṅge.

<sup>7</sup> Yih madd-e-nazar rakh kar Allāh ne ek aur din muqarrar kiyā, mazkūrā “Āj” kā din. Kāī sāloṅ ke bād hī us ne Dāūd kī mārifat wuh bāt kī jis par ham ġhaur kar rahe haiṅ,

“Agar tum āj Allāh kī āwāz suno  
to apne diloṅ ko saḳht na karo.”

<sup>8</sup> Jab Yashua unheṅ Mulk-e-Kanān meṅ lāyā tab us ne Isrāīliyōn ko yih sukūn na diyā, warnā Allāh is ke bād ke kisī aur din kā zikr na kartā.



9 Chunānche Allāh kī qaum ke lie ek khās sukūn bāqī rah gayā hai, aisā sukūn jo Allāh ke sātweñ din ārām karne se mutābiqat rakhtā hai.

10 Kyoñki jo bhī wuh sukūn pātā hai jis kā wādā Allāh ne kiyā wuh Allāh kī tarah apne kāmōñ se fāriḡh ho kar ārām karegā.

11 Is lie āeñ, ham is sukūn meñ dākḡhil hone kī pūrī koshish karen tākī ham meñ se koī bhī bāpdādā ke nāfarmān namūne par chal kar gunāh meñ na gir jāe.

12 Kyoñki Allāh kā kalām zindā, muassir aur har dodhārī talwār se zyādā tez hai. Wuh insān meñ se guzar kar us kī jāñ rūh se aur us ke joṛōñ ko gūde se alag kar letā hai. Wuhī dil ke ḡhayālāt aur soch ko jāñch kar un par faislā karne ke qābil hai.

13 Koī maḡhlūḡ bhī Allāh kī nazar se nahīn chhup saktī. Us kī āñkhoñ ke sāmne jis ke jawābdeh ham hote haiñ sab kuchh ayāñ aur beniqāb hai.

### *Īsā Hamārā Imām-e-Āzam Hai*

14 Ḡharz āeñ, ham us imān se lipṭe raheñ jis kā iqrār ham karte haiñ. Kyoñki hamārā aisā azīm imām-e-āzam hai jo āsmānoñ meñ se guzar gayā yāñī Īsā Allāh kā Farzand.

15 Aur wuh aisā imām-e-āzam nahīn hai jo hamārī kamzoriyōñ ko dekh kar hamdardī na dikhāe balki agarche wuh begunāh rahā to bhī hamārī tarah use har qism kī āzmāish kā sāmna karnā parā.

16 Ab āeñ, ham pūre etamād ke sāth Allāh ke taḡht ke sāmne hāzir ho jāeñ jahāñ fazl pāyā

jātā hai. Kyoñki wahīn ham wuh rahm aur fazl pāeñge jo zarūrat ke waqt hamārī madad kar saktā hai.

## 5

<sup>1</sup> Ab insānoñ meñ se chune gae imām-e-āzam ko is lie muqarrar kiyā jātā hai ki wuh un kī khātir Allāh kī khidmat kare, tāki wuh gunāhoñ ke lie nazarāne aur qurbāniyāñ pesh kare.

<sup>2</sup> Wuh jāhil aur āwārā logoñ ke sāth narm sulūk rakh saktā hai, kyoñki wuh khud kā tarah kī kamzoriyōñ kī girift meñ hotā hai.

<sup>3</sup> Yihī wajah hai ki use na sirf qaum ke gunāhoñ ke lie balki apne gunāhoñ ke lie bhī qurbāniyāñ charhānī partī haiñ.

<sup>4</sup> Aur koī apnī marzī se imām-e-āzam kā purwaqār ohdā nahīn apnā saktā balki lāzim hai ki Allāh use Hārūn kī tarah bulā kar muqarrar kare.

<sup>5</sup> Isī tarah Masīh ne bhī apnī marzī se imām-e-āzam kā purwaqār ohdā nahīn apnāyā. Is ke bajāe Allāh ne us se kahā,

“Tū merā Farzand hai,  
āj main terā Bāp ban gayā hūñ.”

<sup>6</sup> Kahīn aur wuh farmātā hai,  
“Tū abad tak imām hai,  
aisā imām jaisā Malik-e-sidq thā.”

<sup>7</sup> Jab Īsā is duniyā meñ thā to us ne zor zor se pukār kar aur ānsū bahā bahā kar use duāeñ aur iltijāeñ pesh kīñ \* jo use maut se bachā saktā

---

\* 5:7 Yānī imām kī haisiyat se us ne yih duāeñ aur iltijāeñ qurbānī ke taur par pesh kīñ.

thā. Aur Allāh ne us kī sunī, kyoñki wuh Ḳhudā kā ḳhauf rakhtā thā.

<sup>8</sup> Wuh Allāh kā Farzand to thā, to bhī us ne dukh uṭhāne se farmānbardārī sīkhī.

<sup>9</sup> Jab wuh kāmiliyat tak pahuñch gayā to wuh un sab kī abadi najāt kā sarchashmā ban gayā jo us kī sunte haiñ.

<sup>10</sup> Us waqt Allāh ne use imām-e-āzam bhī muta'ayyin kiyā, aisā imām jaisā Malik-e-sidq thā.

### *Imān Tark Karne kī Bābat Āgāhī*

<sup>11</sup> Is ke bāre meñ ham mazīd bahut kuchh kah sakte haiñ, lekin ham mushkil se is kī tashrīh kar sakte haiñ, kyoñki āp sunane meñ sust haiñ.

<sup>12</sup> Asal meñ itnā waqt guzar gayā hai ki ab āp ko ḳhud ustād honā chāhie. Afsos ki aisā nahīn hai balki āp ko is kī zarūrat hai ki koī āp ke pās ā kar āp ko Allāh ke kalām kī buniyādī sachchāiyāñ dubārā sikhāe. Āp ab tak ṭhos khānā nahīn khā sakte balki āp ko dūdh kī zarūrat hai.

<sup>13</sup> Jo dūdh hī pī saktā hai wuh abhī chhoṭā bachchā hī hai aur wuh rāstbāzī kī tālīm se nāwāqif hai.

<sup>14</sup> Is ke muqābale meñ ṭhos khānā bālighoñ ke lie hai jinhoñ ne apnī balūghat ke bāis apnī ruhānī basārat ko itnī tarbiyat dī hai ki wuh bhalāi aur burāi meñ imtiyāz kar sakte haiñ.

## 6

<sup>1</sup> Is lie āeñ, ham Masīh ke bāre meñ buniyādī tālīm ko chhoṭ kar balūghat kī taraf āge barheñ. Kyoñki aisi bāteñ dohrāne kī zarūrat nahīn honī chāhie jin se imān kī buniyād rakhī jāti hai,

masalan maut tak pahuñchāne wāle kām se taubā,

<sup>2</sup> baptismā kyā hai, kisī par hāth rakhne kī tālīm, murdoñ ke jī uṭhne aur abadī sazā pāne kī tālīm.

<sup>3</sup> Chunānche Allāh kī marzī huī to ham yih chhoṛ kar āge baṛheñge.

<sup>4</sup> Nāmumkin hai ki unheñ bahāl karke dubārā taubā tak pahuñchāyā jāe jinhoñ ne apnā īmān tark kar diyā ho. Unheñ to ek bār Allāh ke nūr meñ lāyā gayā thā, unhoñ ne āsmān kī nemat chakh lī thī, wuh Rūhul-quds meñ sharīk hue,

<sup>5</sup> unhoñ ne Allāh ke kalām kī bhalāī aur āne wāle zamāne kī kuwwatoñ kā tajrabā kiyā thā.

<sup>6</sup> Aur phir unhoñ ne apnā īmān tark kar diyā! Aise logoñ ko bahāl karke dubārā taubā tak pahuñchānā nāmumkin hai. Kyoñki aisā karne se wuh Allāh ke Farzand ko dubārā maslūb karke use lān-tān kā nishānā banā dete haiñ.

<sup>7</sup> Allāh us zamīn ko barkat detā hai jo apne par bār bār paṛne wālī bārish ko jazb karke aisī fasal paidā kartī hai jo khetībārī karne wāle ke lie mufīd ho.

<sup>8</sup> Lekin agar wuh sirf ḳhārdār paude aur ūñṭkaṭāre paidā kare to wuh bekār hai aur is ḳhatre meñ hai ki us par lānat bhejī jāe. Anjām-e-kār us par kā sab kuchh jalāyā jāegā.

<sup>9</sup> Azīzo, go ham is tarah kī bāteñ kar rahe haiñ to bhī hamārā etamād yih hai ki āp ko wuh behtarīn barkateñ hāsīl haiñ jo najāt se miltī haiñ.

<sup>10</sup> Kyoñki Allāh be'insāf nahīn hai. Wuh āp kā kām aur wuh muhabbat nahīn bhūlegā jo āp ne

us kā nām le kar zāhir kī jab āp ne muqaddasīn kī k̄hidmat kī balki āj tak kar rahe haiñ.

<sup>11</sup> Lekin hamārī baṛī k̄hāhish yih hai ki āp meñ se har ek isī sargarmī kā izhār āk̄hir tak kartā rahe tāki jin bātoñ kī ummīd āp rakhte haiñ wuh wāqai pūrī ho jāeñ.

<sup>12</sup> Ham nahīn chāhte ki āp sust ho jāeñ balki yih ki āp un ke namūne par chaleñ jo īmān aur sabar se wuh kuchh mirās meñ pā rahe haiñ jis kā wādā Allāh ne kiyā hai.

### *Allāh kā Yaqīnī Wādā*

<sup>13</sup> Jab Allāh ne qasam khā kar Ibrāhīm se wādā kiyā to us ne apnī hī qasam khā kar yih wādā kiyā. Kyonki koī aur nahīn thā jo us se baṛā thā jis kī qasam wuh khā saktā.

<sup>14</sup> Us waqt us ne kahā, “Maiñ zarūr tujhe bahut barkat dūngā, aur maiñ yaqīnan tujhe kasrat kī aulād dūngā.”

<sup>15</sup> Is par Ibrāhīm ne sabar se intazār karke wuh kuchh pāyā jis kā wādā kiyā gayā thā.

<sup>16</sup> Qasam khāte waqt log us kī qasam khāte haiñ jo un se baṛā hotā hai. Is tarah se qasam meñ bayānkardā bāt kī tasdīq bahs-mubāhasā kī har gunjāish ko k̄hatm kar detī hai.

<sup>17</sup> Allāh ne bhī qasam khā kar apne wāde kī tasdīq kī. Kyonki wuh apne wāde ke wārison par sāf zāhir karnā chāhtā thā ki us kā irādā kabhī nahīn badlegā.

<sup>18</sup> Ġharz, yih do bāteñ qāym rahī haiñ, Allāh kā wādā aur us kī qasam. Wuh inheñ na to badal saktā na in ke bāre meñ jhūṭ bol saktā hai. Yoñ ham jinhoñ ne us ke pās panāh lī hai baṛī tasallī

pā kar us ummīd ko mazbūtī se thāme rakh sakte haiñ jo hameñ pesh kī gaī hai.

<sup>19</sup> Kyonki yih ummīd hamārī jān ke lie mazbūt langar hai. Aur yih āsmānī Baitul-muqaddas ke Muqaddastarīn Kamre ke parde meñ se guzar kar us meñ dākḥil hotī hai.

<sup>20</sup> Wahīn Īsā hamāre āge āge jā kar hamārī kḥātir dākḥil huā hai. Yoñ wuh Malik-e-sidq kī mānind hameshā ke lie imām-e-āzam ban gayā hai.

## 7

### *Malik-e-sidq*

<sup>1</sup> Yih Malik-e-sidq, Sālim kā bādshāh aur Allāh T'alā kā imām thā. Jab Ibrāhīm chār bādshāhoñ ko shikast dene ke bād wāpas ā rahā thā to Malik-e-sidq us se milā aur use barkat dī.

<sup>2</sup> Is par Ibrāhīm ne use tamām lūṭ ke māl kā daswāñ hissā de diyā. Ab Malik-e-sidq kā matlab "Rāstbāzī kā Bādshāh" hai. Dūsre, "Sālim kā Bādshāh" kā matlab "Salāmatī kā Bādshāh" hai.

<sup>3</sup> Na us kā bāp yā māñ hai, na koī nasabnāmā. Us kī zindagī kā na to āghāz hai, na ikḥtitām. Allāh ke Farzand kī tarah wuh abad tak imām rahtā hai.

<sup>4</sup> Ghaur karen ki wuh kitnā azīm thā. Hamāre bāpdādā Ibrāhīm ne use lūṭe hue māl kā daswāñ hissā de diyā.

<sup>5</sup> Ab sharīat talab kartī hai ki Lāwī kī wuh aulād jo imām ban jātī hai qaum yānī apne bhāiyōñ se paidāwār kā daswāñ hissā le, hālāñki un ke bhāi Ibrāhīm kī aulād haiñ.

<sup>6</sup> Lekin Malik-e-sidq Lāwī kī aulād meñ se nahīñ thā. To bhī us ne Ibrāhīm se daswāñ hissā le kar use barkat dī jis se Allāh ne wādā kiyā thā.

<sup>7</sup> Is meñ koī shak nahīñ ki kamhaisiyat shaḡhs ko us se barkat miltī hai jo zyādā haisiyat kā ho.

<sup>8</sup> Jahāñ Lāwī imāmoñ kā tālluḡ hai fāñī insān daswāñ hissā lete haiñ. Lekin Malik-e-sidq ke muāmāle meñ yih hissā us ko milā jis ke bāre meñ gawāhī dī gaī hai ki wuh zindā rahtā hai.

<sup>9</sup> Yih bhī kahā jā saktā hai ki jab Ibrāhīm ne māl kā daswāñ hissā de diyā to Lāwī ne us ke zariye bhī yih hissā diyā, hālāñki wuh ḡhud daswāñ hissā letā hai.

<sup>10</sup> Kyoñki go Lāwī us waḡt paidā nahīñ huā thā to bhī wuh ek tarah se Ibrāhīm ke jism meñ maujūd thā jab Malik-e-sidq us se milā.

<sup>11</sup> Agar Lāwī kī kahānat (jis par shariāt mabnī thī) kāmiliyat paidā kar saktī to phir ek aur ḡism ke imām kī kyā zarūrat hotī, us kī jo Hārūn jaisā na ho balki Malik-e-sidq jaisā?

<sup>12</sup> Kyoñki jab bhī kahānat badal jātī hai to lāzim hai ki shariāt meñ bhī tabdīlī ae.

<sup>13</sup> Aur hamārā ḡhudāwand jis ke bāre meñ yih bayān kiyā gayā hai wuh ek farḡ ḡabile kā fard thā. Us ke ḡabile ke kisī bhī fard ne imām kī ḡhidmat adā nahīñ kī.

<sup>14</sup> Kyoñki sāf mālūm hai ki ḡhudāwand Masīh Yahūdāh ḡabile kā fard thā, aur Mūsā ne is ḡabile ko imāmoñ kī ḡhidmat meñ shāmil na kiyā.

### *Malik-e-sidq Jaisā Ek aur Imām*

<sup>15</sup> Muāmālā mazīd sāf ho jātā hai. Ek farḡ imām zāhir huā hai jo Malik-e-sidq jaisā hai.

16 Wuh Lāwī ke qabīle kā fard hone se imām na banā jis tarah shāriyat taqāzā kartī thī, balki wuh lāfānī zindagī kī quwwat hī se imām ban gayā.

17 Kyōñki kalām-e-muqaddas farmātā hai,  
 “Tū abad tak imām hai,  
 aisā imām jaisā Malik-e-sidq thā.”

18 Yoñ purāne hukm ko mansūkh kar diyā jātā hai, kyōñki wuh kamzor aur bekār thā

19 (Mūsā kī shāriyat to kisī chīz ko kāmīl nahīn banā saktī thī) aur ab ek behtar ummīd muhaiyā kī gaī hai jis se ham Allāh ke qarīb ā jāte haiñ.

20 Aur yih nayā nizām Allāh kī qasam se qāym huā. Aisī koī qasam na khāī gaī jab dūsre imām bane.

21 Lekin Īsā ek qasam ke zariye imām ban gayā jab Allāh ne farmāyā,

“Rab ne qasam khāī hai  
 aur is se pachhtāegā nahīn,  
 ‘Tū abad tak imām hai.’ ”

22 Is qasam kī wajah se Īsā ek behtar ahd kī zamānat detā hai.

23 Ek aur farq, purāne nizām meñ bahut-se imām the, kyōñki maut ne har ek kī k̄hidmat mahdūd kie rakhī.

24 Lekin chūñki Īsā abad tak zindā hai is lie us kī kahānat kabhī bhī k̄hatm nahīn hogī.

25 Yoñ wuh unheñ abadī najāt de saktā hai jo us ke wasīle se Allāh ke pās āte haiñ, kyōñki wuh abad tak zindā hai aur un kī shafā'at kartā rahtā hai.

26 Hameñ aise hī imām-e-āzam kī zarūrat thī. Hāñ, aisā imām jo muqaddas, bequsūr, bedāgh,



gunāhgāroñ se alag aur āsmānoñ se buland huā hai.

<sup>27</sup> Use dūsre imāmoñ kī tarah is kī zarūrat nahīñ ki har roz qurbāniyāñ pesh kare, pahle apne lie phir qaum ke lie. Balki us ne apne āp ko pesh karke apnī is qurbānī se un ke gunāhoñ ko ek bār sadā ke lie miṭā diyā.

<sup>28</sup> Mūsawī shariyat aise logoñ ko imām-e-āzam muqarrar kartī hai jo kamzor haiñ. Lekin shariyat ke bād Allāh kī qasam Farzand ko imām-e-āzam muqarrar kartī hai, aur yih Farzand abad tak kāmīl hai.

## 8

### *Īsā Hamārā Imām-e-Āzam*

<sup>1</sup> Jo kuchh ham kah rahe haiñ us kī markazī bāt yih hai, hamārā ek aisā imām-e-āzam hai jo āsmān par jalālī Ḳhudā ke taḳht ke dahne hāth baiṭhā hai.

<sup>2</sup> Wahāñ wuh maqdis meñ ḳhidmat kartā hai, us haqīqī mulāqāt ke ḳhaimē meñ jise insānī hāthoñ ne kharā nahīñ kiyā balki Rab ne.

<sup>3</sup> Har imām-e-āzam ko nazarāne aur qurbāniyāñ pesh karne ke lie muqarrar kiyā jātā hai. Is lie lāzim hai ki hamāre imām-e-āzam ke pās bhī kuchh ho jo wuh pesh kar sake.

<sup>4</sup> Agar yih duniyā meñ hotā to imām-e-āzam na hotā, kyonki yahāñ imām to haiñ jo shariyat ke matlūbā nazarāne pesh karte haiñ.

<sup>5</sup> Jis maqdis meñ wuh ḳhidmat karte haiñ wuh us maqdis kī sirf naqlī sūrāt aur sāyā hai jo āsmān par hai. Yihī wajah hai ki Allāh ne Mūsā

ko mulāqāt kā khaimā banāne se pahle āgāh karke yih kahā, “Ġhaur kar ki sab kuchh ain us namūne ke mutābiq banāyā jāe jo main tujhe yahān pahar par dikhātā hūñ.”

<sup>6</sup> Lekin jo khidmat Īsā ko mil gaī hai wuh duniyā ke imāmoñ kī khidmat se kahīn behtar hai, utnī behtar jitnā wuh ahd jis kā darmiyānī Īsā hai purāne ahd se behtar hai. Kyoñki yih ahd behtar wādoñ kī buniyād par bāndhā gayā.

<sup>7</sup> Agar pahlā ahd be'ilzām hotā to phir nae ahd kī zarurat na hotī.

<sup>8</sup> Lekin Allāh ko apnī qaum par ilzām lagānā parā. Us ne kahā,

“Rab kā farmān hai, aise din ā rahe haiñ jab main Isrāil ke gharāne aur Yahūdāh ke gharāne se ek nayā ahd bāndhūngā.

<sup>9</sup> Yih us ahd kī mānind nahīn hogā jo main ne un ke bāpdādā ke sāth us din bāndhā thā jab main un kā hāth pakaṛ kar

unheñ Misr se nikāl lāyā.

Kyoñki wuh us ahd ke wafādār na rahe

jo main ne un se bāndhā thā.

Natiye meñ merī un ke lie fikr na rahī.

<sup>10</sup> Khudāwand farmātā hai ki jo nayā ahd main un dinoñ ke bād un se bāndhūngā

us ke taht main apnī shariyat

un ke zahnoñ meñ ḍāl kar

un ke diloñ par kandā karūngā.

Tab main hī un kā Khudā hūngā, aur wuh merī qaum hoñge.

<sup>11</sup> Us waqt se is kī zarurat nahīn rahegī

ki koī apne paṛosī yā bhāi ko tālīm de kar kahe,  
'Rab ko jān lo.'

Kyonki chhoṭe se le kar baṛe tak  
sab mujhe jāneṅge,

<sup>12</sup> kyonki main un kā qusūr muāf karūṅga  
aur āindā un ke gunāhoñ ko yād nahīn  
karūṅga."

<sup>13</sup> In alfāz meñ Allāh ek nae ahd kā zikr kartā  
hai aur yoñ purāne ahd ko matrūk qarār detā  
hai. Aur jo matrūk aur purānā hai us kā anjām  
qarīb hī hai.

## 9

### *Dunyāwī aur Āsmānī Ibādat*

<sup>1</sup> Jab pahlā ahd bāndhā gayā to ibādat karne  
ke lie hidāyāt dī gaīñ. Zamīn par ek maqdis bhī  
banāyā gayā,

<sup>2</sup> ek khaimā jis ke pahle kamre meñ shamādān,  
mez aur us par paṛī maḥsūs kī gaī roṭiyāñ thīñ.  
Us kā nām "Muqaddas Kamrā" thā.

<sup>3</sup> Us ke pīchhe ek aur kamrā thā jis kā nām  
"Muqaddastarīn Kamrā" thā. Pahle aur dūsre  
kamre ke darmiyāñ wāqe darwāze par pardā  
lagā thā.

<sup>4</sup> Is pichhle kamre meñ baḥhūr jalāne ke lie  
sone kī qurbāngāh aur ahd kā sandūq thā. Ahd  
ke sandūq par sonā manḍhā huā thā aur us meñ  
tīn chīzeñ thīñ: sone kā martabān jis meñ man  
bharā thā, Hārūn kā wuh asā jis se koñpleñ phūṭ  
niklī thīñ aur patthar kī wuh do taḥṭtiyāñ jin par  
ahd ke ahkām likhe the.

<sup>5</sup> Sandūq par ilāhī jalāl ke do karūbī farishte  
lage the jo sandūq ke ḍhakne ko sāyā dete the

jis kā nām “Kaffārā kā dhaknā” thā. Lekin is jagah par ham sab kuchh mazīd tafsīl se bayān nahīn karnā chāhte.

<sup>6</sup> Yih chīzeñ isī tartīb se rakhī jātī haiñ. Jab imām apnī k̄hidmat ke farāyz adā karte haiñ to bāqāydaḡ se pahle kamre meñ jāte haiñ.

<sup>7</sup> Lekin sirf imām-e-āzam hī dūsre kamre meñ dāk̄hil hotā hai, aur wuh bhī sāl meñ sirf ek dafā. Jab bhī wuh jātā hai wuh apne sāth k̄hūn le kar jātā hai jise wuh apne aur qaum ke lie pesh kartā hai tāki wuh gunāh miṭ jāeñ jo logoñ ne ḡhairirādī taur par kie hote haiñ.

<sup>8</sup> Is se Rūhul-quḡds dikhātā hai ki Muḡaddas-tarīn Kamre tak rasāī us waḡt tak zāhir nahīn kī gaī thī jab tak pahlā kamrā istemāl meñ thā.

<sup>9</sup> Yih majāzan maujūdā zamāne kī taraf ishārā hai. Is kā matlab yih hai ki jo nazarāne aur qurbāniyāñ pesh kī jā rahī haiñ wuh parastār ke zamīr ko pāk-sāf karke kāmīl nahīn banā saktīñ.

<sup>10</sup> Kyoñki in kā tālluḡ sirf khāne-pīne wālī chīzoñ aur ḡhūsl kī muḡhtalif rasmoñ se hotā hai, aisī zāhirī hidāyāt jo sirf nae nizām ke āne tak lāḡū haiñ.

<sup>11</sup> Lekin ab Masīh ā chukā hai, un achchhī chīzoñ kā imām-e-āzam jo ab hāsīl huī haiñ. Jis k̄haime meñ wuh k̄hidmat kartā hai wuh kahīñ zyādā azīm aur kāmīl hai. Yih k̄haimā insānī hāthoñ se nahīñ banāyā gayā yānī yih is kāynāt kā hissā nahīñ hai.

<sup>12</sup> Jab Masīh ek bār sadā ke lie k̄haime ke Muḡaddas-tarīn Kamre meñ dāk̄hil huā to us ne qurbāniyāñ pesh karne ke lie bakroñ aur bachhroñ kā k̄hūn istemāl na kiyā. Is ke bajāe

us ne apnā hī ḵhūn pesh kiyā aur yoñ hamāre lie abadī najāt hāsīl kī.

<sup>13</sup> Purāne nizām meñ bail-bakroñ kā ḵhūn aur jawān gāy kī rākh nāpāk logoñ par chhīrke jāte the tāki un ke jism pāk-sāf ho jāeñ.

<sup>14</sup> Agar in chīzoñ kā yih asar thā to phir Masīh ke ḵhūn kā kyā zabardast asar hogā! Azlī Rūh ke zariye us ne apne āp ko bedāgh qurbānī ke taur par pesh kiyā. Yoñ us kā ḵhūn hamāre zamīr ko maut tak pahuñchāne wāle kāmoñ se pāk-sāf kartā hai tāki ham zindā Ḵhudā kī ḵhidmat kar sakeñ.

<sup>15</sup> Yihī wajah hai ki Masīh ek nae ahd kā darmiyānī hai. Maqsad yih thā ki jitne logoñ ko Allāh ne bulāyā hai unheñ Allāh kī mau'ūdā aur abadī mīrās mile. Aur yih sirf is lie mumkin huā hai ki Masīh ne mar kar fidyā diyā tāki log un gunāhoñ se chhuṭkārā pāeñ jo un se us waqt sarzad hue jab wuh pahle ahd ke taht the.

<sup>16</sup> Jahān wasiyat hai wahān zarūrī hai ki wasiyat karne wāle kī maut kī tasdīq kī jāe.

<sup>17</sup> Kyoñki jab tak wasiyat karne wālā zindā ho wasiyat beasar hotī hai. Is kā asar wasiyat karne wāle kī maut hī se shurū hotā hai.

<sup>18</sup> Yihī wajah hai ki pahlā ahd bāndhte waqt bhī ḵhūn istemāl huā.

<sup>19</sup> Kyoñki pūrī qaum ko shariāt kā har hukm sunāne ke bād Mūsā ne bachhroñ kā ḵhūn pānī se milā kar use zūfe ke guchchhe aur qirmizi rang ke dhāge ke zariye Shariāt kī Kitāb aur pūrī qaum par chhīrkā.

<sup>20</sup> Us ne kahā, “Yih ḵhūn us ahd kī tasdīq kartā hai jis kī pairawī karne kā hukm Allāh ne

tumheñ diyā hai.”

<sup>21</sup> Isī tarah Mūsā ne yih ḳhūn mulāqāt ke ḳhaime aur ibādat ke tamām sāmān par chhirkā.

<sup>22</sup> Na sirf yih balki sharīat taqāzā kartī hai ki taqriban har chīz ko ḳhūn hī se pāk-sāf kiyā jāe balki Allāh ke huzūr ḳhūn pesh kie baḡhair muāfi mil hī nahīn saktī.

### *Masīh kī Qurbānī Gunāhoṅ ko Miṭā Detī Hai*

<sup>23</sup> Ḡharz, lāzim thā ki yih chīzeṅ jo āsmān kī aslī chīzoṅ kī naqlī sūratenṅ haiṅ pāk-sāf kī jāeṅ. Lekin āsmānī chīzeṅ ḳhud aisī qurbāniyoṅ kā mutālabā kartī haiṅ jo in se kahīn behtar hoṅ.

<sup>24</sup> Kyoṅki Masīh sirf insānī hāthoṅ se bane maqdis meṅ dāḳhil nahīn huā jo aslī maqdis kī sirf naqlī sūrat thī balki wuh āsmān meṅ hī dāḳhil huā tāki ab se hamārī ḳhātir Allāh ke sāmne hāzir ho.

<sup>25</sup> Duniyā kā imām-e-āzam to sālānā kisī aur (yānī jānwar) kā ḳhūn le kar Muḡaddastarīn Kamre meṅ dāḳhil hotā hai. Lekin Masīh is lie āsmān meṅ dāḳhil na huā ki wuh apne āp ko bār bār qurbānī ke taur par pesh kare.

<sup>26</sup> Agar aisā hotā to use duniyā kī taḳhliq se le kar āj tak bahut dafā dukh sahnā partā. Lekin aisā nahīn hai balki ab wuh zamānoṅ ke iḳhtitām par ek hī bār sadā ke lie zāhir huā tāki apne āp ko qurbān karne se gunāh ko dūr kare.

<sup>27</sup> Ek bār marnā aur Allāh kī adālat meṅ hāzir honā har insān ke lie muḡarrar hai.

<sup>28</sup> Isī tarah Masīh ko bhī ek hī bār bahutoṅ ke gunāhoṅ ko uṭhā kar le jāne ke lie qurbān kiyā gayā. Dūsri bār jab wuh zāhir hogā to gunāhoṅ

ko dūr karne ke lie zāhir nahīn hogā balki unheñ najāt dene ke lie jo shiddat se us kā intazār kar rahe haiñ.

## 10

<sup>1</sup> Mūsawī shariyat āne wālī achchhī aur aslī chīzoñ kī sirf naqlī sūrat aur sāyā hai. Yih un chīzoñ kī aslī shakl nahīn hai. Is lie yih unheñ kabhī bhī kāmīl nahīn kar saktī jo sāl basāl aur bār bār Allāh ke huzūr ā kar wuhī qurbāniyāñ pesh karte rahte haiñ.

<sup>2</sup> Agar wuh kāmīl kar saktī to qurbāniyāñ pesh karne kī zarūrat na rahtī. Kyoñki is sūrat meñ parastār ek bār sadā ke lie pāk-sāf ho jāte aur unheñ gunāhgār hone kā shaūr na rahtā.

<sup>3</sup> Lekin is ke bajāe yih qurbāniyāñ sāl basāl logōñ ko un ke gunāhoñ kī yād dilātī haiñ.

<sup>4</sup> Kyoñki mumkin hī nahīn ki bail-bakroñ kā ḡhūn gunāhoñ ko dūr kare.

<sup>5</sup> Is lie Masīh duniyā meñ āte waqt Allāh se kahtā hai,

“Tū qurbāniyāñ aur nazareñ nahīn chāhtā thā lekin tū ne mere lie ek jism taiyār kiyā.

<sup>6</sup> Bhasm hone wālī qurbāniyāñ aur gunāh kī qurbāniyāñ

tujhe pasand nahīn thīñ.

<sup>7</sup> Phir main bol uṭhā, ‘Ai Ḥudā, main hāzir hūñ

tāki terī marzī pūrī karūñ,

jis tarah mere bāre meñ kalām-e-muqaddas meñ \* likhā hai.’ ”

\* **10:7** Lafzī tarjumā: kitāb ke tūmār meñ.

<sup>8</sup> Pahle Masīh kahtā hai, “Na tū qurbāniyān, nazareñ, bhasm hone wālī qurbāniyān yā gunāh kī qurbāniyān chāhtā thā, na unheñ pasand kartā thā” go shariyat inheñ pesh karne kā mutālabā kartī hai.

<sup>9</sup> Phir wuh farmātā hai, “Maiñ hāzir hūn tāki terī marzī pūrī karūn.” Yoñ wuh pahlā nizām khatm karke us kī jagah dūsrā nizām qāym kartā hai.

<sup>10</sup> Aur us kī marzī pūrī ho jāne se hameñ Īsā Masīh ke badan ke wasīle se maḵsūs-o-muqaddas kiyā gayā hai. Kyonki use ek hī bār sadā ke lie hamāre lie qurbān kiyā gayā.

<sup>11</sup> Har imām roz baroz maqdis meñ khaṛā apnī kḥidmat ke farāyz adā kartā hai. Rozānā aur bār bār wuh wuhī qurbāniyān pesh kartā rahtā hai jo kabhī bhī gunāhoñ ko dūr nahīn kar saktīn.

<sup>12</sup> Lekin Masīh ne gunāhoñ ko dūr karne ke lie ek hī qurbānī pesh kī, ek aisī qurbānī jis kā asar sadā ke lie rahegā. Phir wuh Allāh ke dahne hāth baiṭh gayā.

<sup>13</sup> Wahīn wuh ab intazār kartā hai jab tak Allāh us ke dushmanoñ ko us ke pānwoñ kī chaukī na banā de.

<sup>14</sup> Yoñ us ne ek hī qurbānī se unheñ sadā ke lie kāmīl banā diyā hai jinheñ muqaddas kiyā jā rahā hai.

<sup>15</sup> Rūhul-quds bhī hameñ is ke bāre meñ gawāhī detā hai. Pahle wuh kahtā hai,

<sup>16</sup> “Rab farmātā hai ki  
jo nayā ahd maiñ un dinoñ ke bād un se  
bāndhūngā  
us ke taht maiñ apnī shariyat  
un ke diloñ meñ ḍāl kar



un ke zahnoñ par kandā karūnga.”

17 Phir wuh kahtā hai, “Us waqt se main un ke gunāhoñ aur burāiyoñ ko yād nahīn karūnga.”

18 Aur jahān in gunāhoñ kī muāfi huī hai wahān gunāhoñ ko dūr karne kī qurbāniyoñ kī zarūrat hī nahīn rahī.

### *Āeñ, Ham Allāh ke Huzūr Āeñ*

19 Chunānche bhāiyo, ab ham Īsā ke ḳhūn ke wasile se pūre etamād ke sāth Muḳaddastarīn Kamre meñ dāḳhil ho sakte haiñ.

20 Apne badan kī qurbānī se Īsā ne us kamre ke parde meñ se guzarne kā ek nayā aur zindagiḅaḳhsh rāstā khol diyā.

21 Hamārā ek azīm imām-e-āzam hai jo Allāh ke ghar par muḳarrar hai.

22 Is lie āeñ, ham ḳhulūsdilī aur imān ke pūre etamād ke sāth Allāh ke huzūr āeñ. Kyoñki hamāre diloñ par Masīh kā ḳhūn chhīrkā gayā hai tāki hamāre mujrim zamīr sāf ho jāeñ. Nīz, hamāre badanoñ ko pāk-sāf pānī se dhoyā gayā hai.

23 Āeñ, ham mazbūtī se us ummīd ko thāme rakheñ jis kā iqrār ham karte haiñ. Ham dāñwāñdol na ho jāeñ, kyoñki jis ne is ummīd kā wādā kiyā hai wuh wafādār hai.

24 Aur āeñ, ham is par dhyān deñ ki ham ek dūsre ko kis tarah muḅabbat dikhāne aur nek kām karne par ubhār sakeñ.

25 Ham bāham jamā hone se bāz na āeñ, jis tarah bāz kī ādat ban gaī hai. Is ke bajāe ham ek dūsre kī hauslā-afzāī kareñ, ḳhāskar yih bāt madd-e-nazar rakh kar ki Ḳhudāwand kā din qarīb ā rahā hai.

26 Khabardār! Agar ham sachchāī jān lene ke bād bhī jān-būjh kar gunāh karte raheñ to Masīh kī qurbānī in gunāhoñ ko dūr nahīn kar sakegī.

27 Phir sirf Allāh kī adālat kī haulnāk tawaqqo bāqī rahegī, us bharaktī huī āg kī jo Allāh ke muḥhālifoñ ko bhasm kar ḍālegī.

28 Jo Mūsā kī shariyat radd kartā hai us par rahm nahīn kiyā jā saktā balki agar do yā is se zāyd log is jurm kī gawāhī deñ to use sazā-e-maut dī jāe.

29 To phir kyā khayāl hai, wuh kitnī saḥt sazā ke lāyq hogā jis ne Allāh ke Farzand ko pānwoñ tale raundā? Jis ne ahd kā wuh ḳhūn haqīr jānā jis se use maḥsūs-o-muqaddas kiyā gayā thā? Aur jis ne fazl ke Rūh kī be'izzatī kī?

30 Kyoñki ham use jānte haiñ jis ne farmāyā, “Intaqām lenā merā hī kām hai, maiñ hī badlā lūngā.” Us ne yih bhī kahā, “Rab apnī qaum kā insāf karegā.”

31 Yih ek haulnāk bāt hai agar zindā Kḥudā hameñ sazā dene ke lie pakare.

32 Īmān ke pahle dīn yād karen jab Allāh ne āp ko raushan kar diyā thā. Us waqt ke saḥt muqābale meñ āp ko kāi tarah kā dukh sahnā paḍā, lekin āp sābitqadam rahe.

33 Kabhī kabhī āp kī be'izzatī aur awām ke sāmne hī izārasānī hotī thī, kabhī kabhī āp un ke sāthī the jin se aisā sulūk ho rahā thā.

34 Jinheñ jel meñ ḍālā gayā āp un ke dukh meñ sharīk hue aur jab āp kā māl-o-matā lūṭā gayā to āp ne yih bāt ḳhushī se bardāsht kī. Kyoñki āp jānte the ki wuh māl ham se nahīn chhīn liyā

gayā jo pahle kī nisbat kahīn behtar hai aur har sūrat meñ qāym rahegā.

<sup>35</sup> Chunānche apne is etamād ko hāth se jāne na deñ kyoñki is kā barā ajr milegā.

<sup>36</sup> Lekin is ke lie āp ko sābitqadmī kī zarūrat hai tāki āp Allāh kī marzī pūrī kar sakeñ aur yoñ āp ko wuh kuchh mil jāe jis kā wādā us ne kiyā hai.

<sup>37</sup> Kyoñki kalām-e-muqaddas yih farmātā hai,  
 “Thoṛī hī der bāqī hai  
 to āne wālā pahuñchegā, wuh der nahīn karegā.

<sup>38</sup> Lekin merā rāstbāz īmān hī se jītā rahegā,  
 aur agar wuh pīchhe haṭ jāe  
 to maiñ us se khush nahīn hūngā.”

<sup>39</sup> Lekin ham un meñ se nahīn haiñ jo pīchhe haṭ kar tabāh ho jāeñge balki ham un meñ se haiñ jo īmān rakh kar najāt pāte haiñ.

## 11

### *īmān*

<sup>1</sup> īmān kyā hai? Yih ki ham us meñ qāym raheñ jis par ham ummīd rakhte haiñ aur ki ham us kā yaqīn rakheñ jo ham nahīn dekh sakte.

<sup>2</sup> īmān hī se purāne zamānoñ ke logoñ ko Allāh kī qabūliyat hāsil huī.

<sup>3</sup> īmān ke zariye ham jān lete haiñ ki kāynāt ko Allāh ke kalām se khalaq kiyā gayā, ki jo kuchh ham dekh sakte haiñ nazar āne wālī chīzoñ se nahīn banā.

<sup>4</sup> Yih īmān kā kām thā ki Hābīl ne Allāh ko ek aisī qurbānī pesh kī jo Qābīl kī qurbānī se behtar thī. Is īmān kī binā par Allāh ne use rāstbāz

ṭhahrā kar us kī achchhī gawāhī dī, jab us ne us kī qurbāniyoñ ko qabūl kiyā. Aur imān ke zariye wuh ab tak boltā rahtā hai hālānki wuh murdā hai.

<sup>5</sup> Yih imān kā kām thā ki Hanūk na marā balki zindā hālat meñ āsmān par uṭhāyā gayā. Koī bhī use dhūṇḍ kar pā na sakā kyoñki Allāh use āsmān par uṭhā le gayā thā. Wajah yih thī ki uṭhāe jāne se pahle use yih gawāhī milī ki wuh Allāh ko pasand āyā.

<sup>6</sup> Aur imān rakhe baḡhair ham Allāh ko pasand nahīn ā sakte. Kyoñki lāzim hai ki Allāh ke huzūr āne wālā imān rakhe ki wuh hai aur ki wuh unheñ ajr detā hai jo us ke tālib haiñ.

<sup>7</sup> Yih imān kā kām thā ki Nūh ne Allāh kī sunī jab us ne use āne wālī bātoñ ke bāre meñ āgāh kiyā, aisi bātoñ ke bāre meñ jo abhī dekhne meñ nahīn āī thīñ. Nūh ne Ḳhudā kā khauf mān kar ek kashtī banāī tāki us kā ḳhāndān bach jāe. Yoñ us ne apne imān ke zariye duniyā ko mujrim qarār diyā aur us rāstbāzī kā wāris ban gayā jo imān se hāsil hotī hai.

<sup>8</sup> Yih imān kā kām thā ki Ibrāhīm ne Allāh kī sunī jab us ne use bulā kar kahā ki wuh ek aise mulk meñ jāe jo use bād meñ mīrās meñ milegā. Hāñ, wuh apne mulk ko chhoṛ kar rawānā huā, hālānki use mālūm na thā ki wuh kahān jā rahā hai.

<sup>9</sup> Imān ke zariye wuh wādā kie hue mulk meñ ajnabī kī haisiyat se rahne lagā. Wuh ḳhaimoñ meñ rahtā thā aur isī tarah Is'hāq aur Yāqūb bhī jo us ke sāth usī wāde ke wāris the.

<sup>10</sup> Kyoñki Ibrāhīm us shahr ke intazār meñ thā jis kī mazbūt buniyād hai aur jis kā naqsh

banāne aur tāmīr karne wālā ḵhud Allāh hai.

<sup>11</sup> Yih imān kā kām thā ki Ibrāhīm bāp banane ke qābil ho gayā, hālānki wuh burhāpe kī wajah se bāp nahīn ban saktā thā. Isī tarah Sārā bhī bachche janm nahīn de saktī thī. Lekin Ibrāhīm samajhtā thā ki Allāh jis ne wādā kiyā hai wafādār hai.

<sup>12</sup> Go Ibrāhīm taqrīban mar chukā thā to bhī usī ek shaḵhs se beshumār aulād niklī, tādād meñ āsmān par ke sitāroñ aur sāhil par kī ret ke zarroñ ke barābar.

<sup>13</sup> Yih tamām log imān rakhte rakhte mar gae. Unheñ wuh kuchh na milā jis kā wādā kiyā gayā thā. Unhoñ ne use sirf dūr hī se dekh kar ḵhushāmdīd \* kahā. Aur unhoñ ne taslīm kiyā ki ham zamīn par † sirf mehmān aur ārizī taur par rahne wāle ajnabī haiñ.

<sup>14</sup> Jo is qism kī bāteñ karte haiñ wuh zāhir karte haiñ ki ham ab tak apne watan kī talāsh meñ haiñ.

<sup>15</sup> Agar un ke zahan meñ wuh mulk hotā jis se wuh nikal āe the to wuh ab bhī wāpas jā sakte the.

<sup>16</sup> Is ke bajāe wuh ek behtar mulk yānī ek āsmānī mulk kī ārzū kar rahe the. Is lie Allāh un kā Ḵhudā kahlāne se nahīn sharmātā, kyoñki us ne un ke lie ek shahr taiyār kiyā hai.

<sup>17</sup> Yih imān kā kām thā ki Ibrāhīm ne us waqt Is'hāq ko qurbānī ke taur par pesh kiyā jab Allāh ne use āzmāyā. Hāñ, wuh apne iklaute beṭe ko

---

\* **11:13** Lafzī tarjumā: salāmī dī. Salām de kar izzat kā izhār kiyā. Salyūṭ kiyā. † **11:13** Zamīn par yā mulk (yānī Kanān) meñ.

qurbān karne ke lie taiyār thā agarche use Allāh ke wāde mil gae the

18 ki “Terī nasl Is'hāq hī se qāym rahegī.”

19 Ibrāhīm ne sochā, “Allāh murdoñ ko bhī zindā kar saktā hai,” aur majāzan use wāqāi Is'hāq murdoñ meñ se wāpas mil gayā.

20 Yih imān kā kām thā ki Is'hāq ne āne wālī chīzoñ ke lihāz se Yāqūb aur Esau ko barkat dī.

21 Yih imān kā kām thā ki Yāqūb ne marte waqt Yūsuf ke donoñ beṭoñ ko barkat dī aur apnī lāṭhī ke sire par ṭek lagā kar Allāh ko sijdā kiyā.

22 Yih imān kā kām thā ki Yūsuf ne marte waqt yih peshgoī kī ki Isrāīlī Misr se nikleñge balki yih bhī kahā ki nikalte waqt merī haḍḍiyāñ bhī apne sāth le jāo.

23 Yih imān kā kām thā ki Mūsā ke mān-bāp ne use paidāish ke bād tīn māh tak chhupāe rakhā, kyonki unhoñ ne dekhā ki wuh ḳhūbsūrat hai. Wuh bādshāh ke hukm kī ḳhilāfwarzī karne se na ḍare.

24 Yih imān kā kām thā ki Mūsā ne parwān chaṛh kar inkār kiyā ki use Firaun kī beṭī kā beṭā ṭhahrāyā jāe.

25 Ārizī taur par gunāh se lutfandoz hone ke bajāe us ne Allāh kī qaum ke sāth badsulūkī kā nishānā banane ko tarjīh dī.

26 Wuh samjhā ki jab merī Masīh kī ḳhātir ruswāī kī jāṭī hai to yih Misr ke tamām ḳhazānoñ se zyādā qīmtī hai, kyonki us kī āñkheñ āne wāle ajr par lagī rahīñ.

27 Yih imān kā kām thā ki Mūsā ne bādshāh ke ḡhusse se ḍare baḡhair Misr ko chhoṛ diyā,

kyoñki wuh goyā andekhe ẖhudā ko musalsal apnī āñkhoñ ke sāmne rakhtā rahā.

<sup>28</sup> Yih īmān kā kām thā ki us ne Fasah kī Īd manā kar hukm diyā ki ẖhūn ko chaukhaṭoñ par lagāyā jāe tāki halāk karne wālā farishtā un ke pahlauṭhe beṭoñ ko na chhue.

<sup>29</sup> Yih īmān kā kām thā ki Isrāīlī Bahr-e-Qulzum meñ se yoñ guzar sake jaise ki yih ẖhushk zamīn thī. Jab Misriyoñ ne yih karne kī koshish kī to wuh ḍub gae.

<sup>30</sup> Yih īmān kā kām thā ki sāt din tak Yarīhū Shahr kī fasīl ke gird chakkar lagāne ke bād pūri dīwār gir gaī.

<sup>31</sup> Yih bhī īmān kā kām thā ki Rāhab fāhishā apne shahr ke bāqī nāfarmān bāshindoñ ke sāth halāk na huī, kyoñki us ne Isrāīlī jāsūsoñ ko salāmātī ke sāth ẖhushāmdīd kahā thā.

<sup>32</sup> Maiñ mazīd kyā kuchh kahūñ? Mere pās itnā waqt nahīñ ki maiñ Jidāun, Baraq, Samsūn, Iftāh, Dāūd, Samuel aur nabīyoñ ke bāre meñ sunātā rahūñ.

<sup>33</sup> Yih sab īmān ke sabab se hī kāmyāb rahe. Wuh bādshāhiyoñ par ghālib āe aur insāf karte rahe. Unheñ Allāh ke wāde hāsil hue. Unhoñ ne sherbabaroñ ke muñh band kar diē

<sup>34</sup> aur āg ke bhaṛakte sholoñ ko bujhā diyā. Wuh talwār kī zad se bach nikle. Wuh kamzor the lekin unheñ quwwat hāsil huī. Jab jang chhiṛ gaī to wuh itne tāqatwar sābit hue ki unhoñ ne ghairmulkī lashkaroñ ko shikast dī.

<sup>35</sup> Īmān rakhne ke bāis ẖhawātīn ko un ke murdā azīz zindā hālat meñ wāpas mile.

Lekin aise bhī the jinheñ tashaddud bardāsht karnā paṛā aur jinhoñ ne āzād ho jāne se inkār

kiyā tāki unheñ ek behtar chīz yānī jī uṭhne kā tajrabā hāsīl ho jāe.

<sup>36</sup> Bāz ko lān-tān aur koṛoñ balki zanjīroñ aur qaid kā bhī sāmna karnā paṛā.

<sup>37</sup> Unheñ sangsār kiyā gayā, unheñ āre se chīrā gayā, unheñ talwār se mār ḍālā gayā. Bāz ko bheṛ-bakriyōñ kī khāloñ meñ ghūmnā phirnā paṛā. Zarūratmand hālat meñ unheñ dabāyā aur un par zulm kiyā jātā rahā.

<sup>38</sup> Duniyā un ke lāyq nahīn thī! Wuh wīrān jaghoñ meñ, pahāroñ par, ghāroñ aur gaṛhoñ meñ āwārā phirte rahe.

<sup>39</sup> In sab ko imān kī wajah se achchhī gawāhī milī. To bhī inheñ wuh kuchh hāsīl na huā jis kā wādā Allāh ne kiyā thā.

<sup>40</sup> Kyonki us ne hamāre lie ek aisā mansūbā banāyā thā jo kahīn behtar hai. Wuh chāhtā thā ki yih log hamāre baḡhair kāmiliyat tak na pahuñcheñ.

## 12

### *Allāh Hamārā Bāp*

<sup>1</sup> Gharz, ham gawāhoñ ke itne baṛe lashkar se ghere rahte haiñ! Is lie āeñ, ham sab kuchh utāreñ jo hamāre lie rukāwaṭ kā bāis ban gayā hai, har gunāh ko jo hameñ āsānī se uljhā letā hai. Āeñ, ham sābitqadmī se us dauṛ meñ dauṛte raheñ jo hamāre lie muqarrar kī gaī hai.

<sup>2</sup> Aur dauṛte hue ham Īsā ko takte raheñ, use jo imān kā bānī bhī hai aur use takmīl tak pahuñchāne wālā bhī. Yād rahe ki go wuh khushī hāsīl kar saktā thā to bhī us ne salībī



maut kī sharmnāk be'izzatī kī parwā na kī balki use bardāsht kiyā. Aur ab wuh Allāh ke taḡht ke dahne hāth jā baiṡhā hai!

<sup>3</sup> Us par dhyān deŋ jis ne gunāhgāroŋ kī itnī muḡhālafat bardāsht kī. Phir āp thakte thakte bedil nahīn ho jāeŋge.

<sup>4</sup> Dekheŋ, āp gunāh se laṛe to haiŋ, lekin abhī tak āp ko jān dene tak is kī muḡhālafat nahīn karnī paṛī.

<sup>5</sup> Kyā āp kalām-e-muḡaddas kī yih hauslā-afzā bāt bhūl gae haiŋ jo āp ko Allāh ke farzand ṡahrā kar bayān kartī hai,

“Mere beṡe, Rab kī tarbiyat ko haḡīr mat jān, jab wuh tujhe ḡante to na bedil ho.

<sup>6</sup> Kyonki jo Rab ko pyārā hai us kī wuh tāḡib kartā hai,

wuh har ek ko sazā detā hai  
jise us ne beṡe ke taur par ḡabūl kiyā hai.”

<sup>7</sup> Apnī musībatoŋ ko ilāhī tarbiyat samajh kar bardāsht kareŋ. Is meŋ Allāh āp se beṡoŋ kā-sā sulūk kar rahā hai. Kyā kabhī koī beṡā ṡhā jis kī us ke bāp ne tarbiyat na kī?

<sup>8</sup> Agar āp kī tarbiyat sab kī tarah na kī jātī to is kā matlab yih hotā ki āp Allāh ke haḡiqī farzand na hote balki nājāyz aulād.

<sup>9</sup> Dekheŋ, jab hamāre insānī bāp ne hamārī tarbiyat kī to ham ne us kī izzat kī. Agar aisā hai to kitnā zyādā zarūrī hai ki ham apne ruhānī Bāp ke tābe ho kar zindagī pāeŋ.

<sup>10</sup> Hamāre insānī bāpoŋ ne hameŋ apnī samajh ke mutābiḡ ṡoṛī der ke lie tarbiyat dī. Lekin Allāh hamārī aisī tarbiyat kartā hai jo

fāyde kā bāis hai aur jis se ham us kī quddūsiyat meñ sharīk hone ke qābil ho jāte haiñ.

<sup>11</sup> Jab hamārī tarbiyat kī jāti hai to us waqt ham ḳhushī mahsūs nahīñ karte balki ḡham. Lekin jin kī tarbiyat is tarah hotī hai wuh bād meñ rāstbāzī aur salāmatī kī fasal kāṭte haiñ.

### *Hidāyāt*

<sup>12</sup> Chunāñche apne thakehāre bāzuoñ aur kamzor ghuṭnoñ ko mazbūt karen.

<sup>13</sup> Apne rāste chalne ke qābil banā deñ tāki jo azu langarā hai us kā joṛ utar na jāe \* balki shafā pāe.

<sup>14</sup> Sab ke sāth mil kar sulah-salāmatī aur quddūsiyat ke lie jidd-o-jahd karte raheñ, kyonki jo muqaddas nahīñ hai wuh Ḳhudāwand ko kabhī nahīñ dekhegā.

<sup>15</sup> Is par dhyān denā ki koī Allāh ke fazl se mahrūm na rahe. Aisā na ho ki koī karwī jaṛ phūṭ nikle aur baṛh kar taklif kā bāis ban jāe aur bahutoñ ko nāpāk kar de.

<sup>16</sup> Dhyān deñ ki koī bhī zinākār yā Esau jaisā duniyāwī shaḳhs na ho jis ne ek hī khāne ke ewaz apne wuh maurūsī huqūq bech dāle jo use baṛe beṭe kī haisiyat se hāsil the.

<sup>17</sup> Ap ko bhī mālūm hai ki bād meñ jab wuh yih barkat wirāsat meñ pānā chāhtā thā to use radd kiyā gayā. Us waqt use taubā kā mauqā na milā hālāñki us ne āñsū bahā bahā kar yih barkat hāsil karne kī koshish kī.

<sup>18</sup> Ap us tarah Allāh ke huzūr nahīñ āe jis tarah Isrāīlī jab wuh Sīnā Pahār par pahuñche,

---

\* **12:13** Ek aur mumkinā tarjumā: jo langarā hai wuh bhaṭak na jāe.

us pahār ke pās jise chhuā jā saktā thā. Wahān āg bhaṛak rahī thī, andherā hī andherā thā aur āndhī chal rahī thī.

<sup>19</sup> Jab narsinge kī āwāz sunāī dī aur Allāh un se hamkalām huā to sunane wāloñ ne us se iltijā kī ki hamēñ mazīd koī bāt na batā.

<sup>20</sup> Kyoñki wuh yih hukm bardāsht nahīn kar sakte the ki “Agar koī jānwar bhī pahār ko chhū le to use sangsār karnā hai.”

<sup>21</sup> Yih manzar itnā haibatnāk thā ki Mūsā ne kahā, “Maiñ khauf ke māre kāñp rahā hūñ.”

<sup>22</sup> Nahīn, āp Siyyūn Pahār ke pās ā gae haiñ, yānī zindā Kḥudā ke shahr āsmānī Yarūshalam ke pās. Āp beshumār farishtoñ aur jashn manāne wālī jamāt ke pās ā gae haiñ,

<sup>23</sup> un pahlauṭhoñ kī jamāt ke pās jin ke nām āsmān par darj kie gae haiñ. Āp tamām insānoñ ke munsif Allāh ke pās ā gae haiñ aur kāmīl kie gae rāstbāzoñ kī rūhoñ ke pās.

<sup>24</sup> Nīz āp nae ahd ke darmiyānī Īsā ke pās ā gae haiñ aur us chhiṛkāe gae kḥūn ke pās jo Hābīl ke kḥūn kī tarah badlā lene kī bāt nahīn kartā balki ek aisī muāfi detā hai jo kahīn zyādā muassir hai.

<sup>25</sup> Chunāñche kḥabardār raheñ ki āp us kī sunane se inkār na kareñ jo is waqt āp se hamkalām ho rahā hai. Kyoñki agar Isrāīlī na bache jab unhoñ ne duniyāwī paighambar Mūsā kī sunane se inkār kiyā to phir ham kis tarah bacheñge agar ham us kī sunane se inkār kareñ jo āsmān se ham se hamkalām hotā hai.

<sup>26</sup> Jab Allāh Sīnā Pahār par se bol uṭhā to zamīn kāñp gai, lekin ab us ne wādā kiyā hai, “Ek bār phir maiñ na sirf zamīn ko hilā dūngā balki

āsmān ko bhī.”

<sup>27</sup> “Ek bār phir” ke alfāz is taraf ishārā karte haiñ ki ḳhalāq kī gaī chīzoñ ko hilā kar dūr kiyā jāegā aur natīje meñ sirf wuh chīzeñ qāym raheñgī jinheñ hilāyā nahīñ jā saktā.

<sup>28</sup> Chunāñche āeñ, ham shukrguzār hoñ. Kyoñki hameñ ek aisī bādshāhī hāsīl ho rahī hai jise hilāyā nahīñ jā saktā. Hāñ, ham shukrguzārī kī is rūh meñ ehtirām aur ḳhauf ke sāth Allāh kī pasandīdā parastish kareñ,

<sup>29</sup> kyoñki hamārā Ḳhudā haqīqatan bhasm kar dene wālī āg hai.

## 13

### *Ham Allāh ko Kis Tarah Pasand Āeñ*

<sup>1</sup> Ek dūsre se bhāiyoñ kī-sī muhabbat rakhte raheñ.

<sup>2</sup> Mehmān-nawāzī mat bhūlnā, kyoñki aisā karne se bāz ne nādānistā taur par farishtoñ kī mehmān-nawāzī kī hai.

<sup>3</sup> Jo qaid meñ haiñ, unheñ yoñ yād rakhnā jaise āp ḳhud un ke sāth qaid meñ hoñ. Aur jin ke sāth badsulūkī ho rahī hai unheñ yoñ yād rakhnā jaise āp se yih badsulūkī ho rahī ho.

<sup>4</sup> Lāzim hai ki sab ke sab izdiwājī zindagī kā ehtirām kareñ. Shauhar aur bīwī ek dūsre ke wafādār raheñ, kyoñki Allāh zinākāroñ aur shādī kā bandhan toṛne wāloñ kī adālat karegā.

<sup>5</sup> Āp kī zindagī paison ke lālach se āzād ho. Usī par iktifā kareñ jo āp ke pās hai, kyoñki Allāh ne farmāyā hai, “Maiñ tujhe kabhī nahīñ chhoṛūngā, maiñ tujhe kabhī tark nahīñ karūngā.”

6 Is lie ham etamād se kah sakte haiñ,  
 “Rab merī madad karne wālā hai,  
 is lie maiñ nahīñ ḍarūnga.

Insān merā kyā bigār saktā hai?”

7 Apne rāhnumāoñ ko yād rakheñ jinhoñ ne āp ko Allāh kā kalām sunāyā. Is par ḡhaur kareñ ki un ke chāl-chalan se kitnī bhalāī paidā huī hai, aur un ke imān ke namūne par chaleñ.

8 Īsā Masīh māzī meñ, āj aur abad tak yaksān hai.

9 Tarah tarah kī aur begānā tālīmāt āp ko idhar-udhar na bhaṭkāeñ. Āp to Allāh ke fazl se taqwiyyat pāte haiñ aur is se nahīñ ki āp muḡhtalif khānoñ se parhez karte haiñ. Is meñ koī ḡhās fāydā nahīñ hai.

10 Hamāre pās ek aisī qurbāngāh hai jis kī qurbānī khānā mulāqāt ke ḡhaimē meñ ḡhidmat karne wāloñ ke lie manā hai.

11 Kyoñki go imām-e-āzam jānwaroñ kā ḡhūn gunāh kī qurbānī ke taur par Muḡaddastarīn Kamre meñ le jātā hai, lekin un kī lāshoñ ko ḡhaimāgāh ke bāhar jalāyā jātā hai.

12 Is wajah se Īsā ko bhī shahr ke bāhar salībī maut sahnī paṛī tāki qaum ko apne ḡhūn se maḡhsūs-o-muḡaddas kare.

13 Is lie āeñ, ham ḡhaimāgāh se nikal kar us ke pās jāeñ aur us kī be'izzatī meñ sharīk ho jāeñ.

14 Kyoñki yahān hamārā koī qāym rahne wālā shahr nahīñ hai balki ham āne wāle shahr kī shadīd arzū rakhte haiñ.

15 Chunānche āeñ, ham Īsā ke wasīle se Allāh ko hamd-o-sanā kī qurbānī pesh kareñ, yānī hamāre hoñṭoñ se us ke nām kī tārif karne wālā phal nikle.

16 Nīz, bhalāī karnā aur dūsroñ ko apnī barakāt meñ sharīk karnā mat bhūlnā, kyonki aisī qurbāniyān Allāh ko pasand haiñ.

17 Apne rāhnumāoñ kī suneñ aur un kī bāt māneñ. Kyonki wuh āp kī dekh-bhāl karte karte jāgte rahte haiñ, aur is meñ wuh Allāh ke sāmne jawābdeh haiñ. Un kī bāt māneñ tāki wuh ḡhushī se apnī ḡhidmat saranjām deñ. Warnā wuh karāhte karāhte apnī zimmedārī nibhāenge, aur yih āp ke lie mufīd nahīn hogā.

18 Hamāre lie duā kareñ, go hamen yaqīn hai ki hamārā zamīr sāf hai aur ham har lihāz se achchhī zindagī guzārne ke ḡhāhishmand haiñ.

19 Maiñ ḡhāskar is par zor denā chāhtā hūn ki āp duā kareñ ki Allāh mujhe āp ke pās jald wāpas āne kī tawfīq baḡhshe.

### *Āḡhirī Duā*

20 Ab salāmatī kā ḡhudā jo abadī ahd ke ḡhūn se hamāre ḡhudāwand aur bheṛoñ ke azīm charwāhe Īsā ko murdoñ meñ se wāpas lāyā

21 wuh āp ko har achchhī chīz se nawāze tāki āp us kī marzī pūrī kar sakeñ. Aur wuh Īsā Masīh ke zariye ham meñ wuh kuchh paidā kare jo use pasand āe. Us kā jalāl azal se abad tak hotā rahe! Āmīn.

### *Āḡhirī Alfāz*

22 Bhāiyo, mehrbānī karke nasīhat kī in bātoñ par sanjīdagī se ḡhaur kareñ, kyonki maiñ ne āp ko sirf chand alfāz likhe haiñ.

23 Yih bāt āp ke ilm meñ honī chāhie ki hamāre bhāī Tīmuthiyus ko rihā kar diyā gayā hai. Agar

wuh jaldī pahuñche to use sāth le kar āp se milne āūngā.

<sup>24</sup> Apne tamām rāhnumāon aur tamām muqaddasīn ko merā salām kahnā. Iṭalī ke imāndār āp ko salām kahte haiñ.

<sup>25</sup> Allāh kā fazl āp sab ke sāth rahe.

**Kitab-i Muqaddas**  
**The Holy Bible in Urdu, Urdu Geo Version, Roman**  
**Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

---

PDF generated using Haiola and XeLaTeX on 15 May 2025 from source files dated 15 May 2025

123ff8cb-27b3-5817-a02a-22e67145fd30